

籌
遼
碩
畫

卷之四

籌遼碩畫卷三十六

庚申孟春一

天都程開祐仲秩父輯

○欽差募兵工科給事中祝耀祖河南道御史王

象恒爲募兵往援危遼議定乃能責效謹條

陳切要事宜以鼓士氣以裨實用事先是兵

部具題議職等募兵燕趙捍圍京師則虜患

尚遠設法招徠當有投袂而起者訓練歲月

以成一旅之勁而壯京師之威今則募以援

遼時不容緩將怖其危鵠之懸也人心未必

樂赴兵圖其急烏之合也臨陣豈盡知方此
職等責成難勝而直爲是凜凜也但忠義不
激勸則不奮發願以身爲之倡而紀律不申
飭則不嚴明惟有法使無亂則精神鼓舞豪
傑或超距而先登步伍整齊進退皆秉令而
決勝庶幾職等得竭其區區以無負

皇上今日任使而有俾于危急存亡之秋也除兵
部條議倣宋臣張浚法及嘉靖二年陝西甘
涼募兵事例該部移令順永保河四府所屬

州縣召募外所有未盡事宜列款以請伏乞
聖明勅下該部酌量覆奏施行

一選良將以重統領夫有入彀之將而後有入
彀之兵將能轉弱爲強又能萃渙得合故未
議募兵先議選將今訪得京營叅將毛有倫
足當丈人之選而奏師中之吉應破格加陞
援遼副總兵凡一切募練事宜悉聽剴裁及
千把總等官惟所簡用蓋信任旣專則衆無
玩志威望旣立則權無掣肘議合州縣與千

把總所招之兵分別等第年貌籍貫先開送
副總兵驗試堪用然後送職等復驗無異方
給與安家團營訓練乃職等傳宣號令全藉
中軍旗鼓而廉以生威慧而善陣則有叅將
倪寵中軍葉應武守備蘇光正鎮撫李應坤
爲能申明約束應加銜稍示優異統兵援遼
而開功名之門廣器使之路材官中有騎射
驍勇火氣精通膽力足勝百夫忠烈不易九
死謂宜先時蒐羅量能委任則風聲號召氣

類推引十募百募千亦是扼要取捷之法
所謂千城寄重而折衝是賴者也伏候

聖裁

一願監軍以倡勇敢遼左挫衄屢聞草木皆兵
三軍恒怯畏奴如虎然兵無常弱惟是一念
勃發根于忠義則推心置腹之餘有親上死
長之應今募者一人練者一人監出關者又
一人精神不相綰結臂指何能運使職等念
切軍國心如焚熾凡可竭力助勦卽捐糜頂

踵夫豈有愛按臣彈壓畿輔非可擅離職耀
祖願率此萬衆送至遼陽列營防守使兵將
曉暢經略法律樂有安插而後謝事入關但
新募之兵耳目易亂心志難齊須候半載訓
練方可調遣且製造器械務期堅銳萬人之
用鳩集百工朝夕幹辦日久方能成功今訂
期在秋月率衆出關已屬倉皇倘責以遲緩
而催檄旁午是繫騏驥之足而求其千里必
不能矣乃倡義援遼奮不反顧泌水衡門類

多運籌決策之雄章縫釋流雅抱撥亂反治
之略如長治生員牛啓元南樂生員李慎言
德化生員胡盡原任經歷程惟怡願以布衣
從戎探其中藏頗諳兵法應聘致行間叅佐
募練及薊州壯士周光祖占風察候驗若左
券皆屬橐韉隨職出關俟至遼城送經略面
試可用則以破格賞而規後效伏候

聖裁

一禁京軍以防冒濫

祖制設京軍十餘萬擁衛都城近因東事告急招募四出京營內有等技藝稍精或見役選鋒或見充伍卒者希圖冒破錢糧更名應募凡遇營中查點僱倩搪塞身一而名二名一而糧二及召兵出關又以營兵名色規避此等奸弊亟宜嚴禁合無出示曉諭在京三營在府州縣各衛所官軍如有實心應募卽明白開報原係某營某衛兵願出關報效卽行收用紀名附冊給餉如有朦朧冒役者查出一

一名除本兵究革外本營衛指揮千把總以約束不嚴治罪如此稽查清楚庶兵皆有實用而糧無虛冒之弊矣伏候

聖裁

一禁僉派以奠民生畿輔近地承平日久民不知兵一旦驅之所不樂從是兵未集而先亂然燕趙稱慷慨因其情而導之則忠憤激于同仇捍衛如出一體是在賢有司開以分義聳以機權民心好義誰不蒸蒸日上奮若有司

不秉誠心設法誘勸但使奸胥猾里沿門僉
報得財則賣放而假公以營私拂意則迫脅
而倚強以凌弱貽害地方良非淺鮮謂宜嚴
行禁革職等且以此定官評也但不得藉口
禁革僉派遂稱無兵蓋州縣官洞悉一方強
弱多方網羅未有不得人者否則秦越相視
吳懦無能當執白簡繩之矣伏候

聖裁

一取具結以防逃匿凡應募之兵選有堪入營

伍者則防範宜嚴領募千把總等官須查投募人係某府州縣某鄉里籍貫每人連名互結伍長什長隊長認狀逐名查確寫立甘結呈送千把總千把總照隊長認狀逐名查確呈送將官將官存結立案造冊一本呈送副總兵副總兵查確造冊轉送職等兩衙門如望禁一兵逃去卽行連坐法除追賠安家衣裝銀兩同結九人以疎縱治罪仍將本隊隊長停糧責令伍長什長分途緝拿務期必獲如是

立法稽覈庶上下相制利害相連孰敢姑容
一人以犯軍紀伏候

聖裁

一分地方以便團練兵必練而成節制之師營
必定以布訓練之局故募兵積人成伍積伍
成隊積隊成營應募無分後先以成多寡之
形卽當計人編伍計伍編隊計隊立營訓練
亦無分後先以赴緩急之用顧練兵不議地
方則遷徙靡定初投輒離故土則情好難堪

今議萬衆分爲四營除叅將倪寵領兵一營
餘三營應于題准援遼叅遊中聽兵部委用
三員移會職等分撥將領兵營日練如順天
則團練京師城外將軍教場永保河則團練
本郡所用千把總官看募兵多寡酌量撥用
蓋兵各歸本處則稽查籍貫更得于耳目熟
聞而所蒞有該部則遵奉約束又不至驛騷
滋擾但郡守當以禮御將官使得展布四體
而將官宜法御士卒無容構成一隙今日有

能之將有制之兵卽異日善算之將善勝之
兵也練有成效然後合營山海關演習陣法
訂期出關以佐經略敵愾之威伏祈

聖裁

一取器械以預操演夫器械不利以卒予敵故
銳戟長鏃百人可據虎豹之關朽甲鈍兵萬
衆難探豹狼之穴議于兵仗局討五號將軍
虎蹲砲一百位神鎗一千杆戍字庫盔一萬
頂梅花長身甲一萬五千副改造臂手金甲

一萬副腰刀一萬把斬馬刀一千把佛朗機
五千位鳥銃四百杆撒袋五千副弓一萬張
箭五十萬枝盔甲王恭兩廠湧珠砲二百位
三眼鎗三千杆長鈎鎗二千杆神臂弩三百
張弩箭全大小鐵鉛彈及火藥硝黃臨時酌
數取用中有不堪責在監督主事或鳩工改
造務使犀利庶一器有一器之用伏候

聖裁

一酌餉額以寓鼓舞樞臣議募兵一萬步騎各